

Immatrikulationstale 1.9. 2011

Asasakka ilinniartut nutaat

Ilisimatusarfimmut, ilinniagarilikkassinnut, ilinniagartuullu silarsuaannut tamassi uummammik pisumik tikilluaritsi.

Ulluinnarni eqqarsaatigivallaarneq ajorparput immitsinnut qanoq isiginerluta ullormiillu ullormut allannguutit malungerpiassanatigit. Taamaattumik tikeraat qanoq isumaqarfigisarneraatigit soqutiginartuaannapoq tusassallugu – immaqa inuttut, ilaqtariittut, nunarput pillugu, inuiattullu qanoq isumaqarfigisarneraatigit. Ukiumi kingullermi inuit oqaloqatigisarnerini tusagassiutiniillu maluginiarsimavara imatut isummertoqartartoq: kalaallit imminnut tatiginerulersimasut, imaluunniit kalaallit imminnut tatiginerusariaqartut.

Isumaqarpunga taamatut isummertoqartarneranut peqqutaasoq inuiattut akisussaaffimmik annertusigaluttuinnartumik nunatta ineriartornissaanut tigusigaluttuinnarnerput, aalajangiinernullu akisussaagaluttuinnarnerput.

Taamatut ineriartortoqarnera ilisimasaqarnermik pisariaqartitsivoq, ilisimasat atorluartarnissaat kiisalu ilisimasat suliarineqartarnissaat pisariaqarluni. Tassanilu ilissi pingaaruteqarpusi. Pissutigalugu ilinniagartuutut inuiaqatigiinni pisariaqartinneqaqigassi utaqqineqarlusilu aamma sinniisunngulerassi ilinniarluarsimasunut, suli innuttaasut akornanni killeqaqisunut.

Ilinniaqqinneq akisussaaffimmik aamma tigusineruvoq.

Ajunngitsumik, naammaannartumik imaluunniit pitsaavallaanngittumik ingerlanermut akisussaaneq. Pitsaasumik ingerlasoqaraangat takussutissaasarpoq nammineq imaluunniit atuaqatigiit ilinniarnermut piareersarluarsimasoqaraangat. Piareersarluarnerlu isumaqarpoq tiiminut atuagassanik suliassanillu naammassinnittarneq, atuaqatigiinni ilinniartitsisorlu peqatigalugu oqallinnernut peqataaneq sammineqartumullu apeqquteqartarneq.

Isumaqarpunga neriullungalu pitsaasumik ingerlanissassinnut piumassuseqassasusi taamaasillusilu ilinniarnissassinnut akisussaaffimmik tigusillusi.

Ilisimatusatusarfimmi ukiuni makkunani ilinniartunik amerligaluttuinnartunik aallartittoqartarpoq. Ukioq manna 166-iullusi aallartippusi. Siornamut naleqqiullusi 18-inik amerlanerullusi, taamaattumik rekordileeqqippugut. Nunatsinni ilinniarnertuunngorniarfinni aasaq naammassisut 278-iupput. 70%-ingajaalu Ilisimatusarfimmut tigutillutik.

- 70 it Ilinniarfissuarmi aallartipput (januarimilu 25 decentralerlutik aallartissapput)
- 22-it oqaasilerinermut, atuakkialerinermut tusagassiteqarnermullu ilinniarnerminnik aallartipput
- 19-it inuiaat piorsarsimassutsillu oqaluttuarisaaneranik ilinniagaqarlutik aallartipput

- 17- it peqqissaasunngorniarlutik aallartipput
- 14-it inuiaqatigiilerinermut ilinniakkamik aallartipput
- 12-ut inunnik isumaginninnermut siunnersortinngorniarneq aallartippaat
- 9 tusagassiortunngorniarneq aallartippaat
- Kiisalu 3 upperisarsiornermi immikkoortortami aallartillutik

Eqqumaffigeqqulaassavara kajumissaarutigalugulu ilinniarnersi ilaa nunatta avataani semesterimi ataatsimi sinnerluguluunniit ingerlatissallugu periarfissaalluarmat, tassa bachelorinngorniarnermi imaluunniit kandidatinnngorniarnermi. Assersuutigalugu Versailles Universitetimi Paris-imiittoq Master of Inuit Studies-imik taalluni ingerlataqarmata atuartuutitta peqataaffigisinnaasaannik, ilinniartullu arlallit maannakkut Dartmouth College-imiinnikuupput aamma Fairbanks University-mi. Sulilu amerlanersut nunanut allanut atuariartorsinnaallutik.

Maannakkulli Nunatta Ilisimatusarfiani aallartilerpusi. Ilinniartitsisusi ilisimatusartuupput, atuakkasi ilisimatuunit allagaapput atuartitsinerlu ilisimatusarnermik tunngaveqarluni, tassa ilinniagartuut silarsuaaniineq.

Ilinniagartuut silarsuaannut attaveqarnissarsi siulleq, assamminneqarnikkut pisussaavoq. Pisussaq taaneqartarpoq: *Ilinniagartuutut assamminneqarneq*. Isumaqarporlu ilinniagartuut silarsuaanni innuttaaqataalersimaneq. Naggataatigut qinnuvigissuassi atersi taaneqaraangat maanngaqqusarlusi assamminninneqarniassagassi.

Qujanaq!